

## Ամենապատիւ Պատրիարք Սրբազան Հօր Անդրանիկ Պաշտօնական Մուտքը Ս. Յարութեան Տաճարէն Ներս

Չորեքշաբթի, 19 Յունիս 2013, առաւօտեան ժամը 9:00-ին, նորընտիր Հայոց Պատրիարք՝ Ամենապատիւ Տ. Նուրիան Արք. Մանուկեան, Սրբոց Յակոբեանց Միաբանութեան անդամներուն հետ ուղղուեցաւ դէպի Սուրբ Յարութեան Տաճար, կատարելու իր պաշտօնական անդրանիկ մուտքը: Ս. Տեղեաց գոյավիճակի տրամադրութեանց համաձայն, Ս. Քաղաքի երեք Պատրիարքներէն իւրաքանչիւրին իրաւունքն է պաշտօնական մուտք գործել թէ՛ Ս. Յարութեան եւ թէ՛ Ս. Ծննդեան Տաճարներէն ներս, իրենց ընտրութեան կամ զահակալութեան յաջորդող օրերուն:

Տաճարի մուտքին Պատրիարք Սրբազան Հայրը ողջագուրուեցաւ Յունաց եւ Ֆրանչիսկեան Միաբանութեանց ներկայացուցիչ Տեսուչներուն հետ, որմէ անմիջապէս ետք, «Հրաշափառ» շարականի երգեցողութեամբ՝ Պատրիարք Սրբազան Հայրը խնկարկեց եւ երկրպագեց Պատանատեղոյն առաջ, որմէ ետք թափօրը ուղղուեցաւ դէպի մեր Տիրոջ Քրիստոսի Գերեզմանը, ուր «Ուրախ եղէ ես ոյք ասէին ցիս ի տուն Տեառն երթիցուք մեք» սաղմոսը կարդալէ ետք, ուխտ ու երկրպագութիւն կատարուեցաւ միաբանութեան անդամներուն կողմէ: Ուխտէն ետք, թափօրը գերեզմանին շուրջ դառնալով եկաւ Ուշաթափման սրբավայրը: Հոն Պատրիարք Սրբազան Հայրը «Պահպանիչ»ով օրհնեց բովանդակ միաբանութիւնն ու ժողովուրդը: Պատրիարք Սրբազան Հօր օրհնութենէն ետք, բոլոր ներկաները առաջնորդուեցան դէպի Հայոց Տեսչարան, ուր այս առիթով պատրաստուած էր հիւրասիրութիւն: Նախքան հիւրասիրութիւնը, Ս. Յարութեան Հայոց Տեսուչ՝ Հոգշ. Տ. Սամուէլ Ծ.Վրդ. Աղոյեան խօսք առնելով շնորհաւորեց Պատրիարք Սրբազան Հայրը, այս առթիւ հայցելով համագործակցութիւնը միւս երկու յարանուանութիւններու տեսուչներուն, սրբատեղեաց խնդիրները համերաշխ ոգիով լուծելու համար: Ստորեւ կը ներկայացնենք Հայոց Տեսուչի հայերէն լեզուով կարդացած խօսքը:

### *Ամենապատիւ Պատրիարք Սրբազան Հայր,*

*Յանուն Սրբոց Յակոբեանց միաբանութեան մեր Հայրերուն եւ Հայ ժողովուրդին, փառք կու տանք Աստուծոյ որ անզամ մը եւս տուաւ մեզ առիթը շնորհաւորելու ձեզ իրրեւ նոր Պատրիարքը Հայ Երուսաղէմի:*

*Ի ներկայութեան եւ մասնակցութեան միւս իրաւակից յարանուանութեանց՝ Յունաց եւ Կաթողիկ ֆրանչիսկեաններուն, այսօր կատարեցիք այս բացառիկ պաշտօնական մուտքը Սուրբ Յարութեան Տաճար, որպէս իրաւատէրերէն եւ պաշտպաններէն մին Սուրբ Երկրի դարաւոր սրբատեղիներուն, եւ ուխտեցիք Քրիստոսի Սուրբ Գերեզմանին առաջ Հաւատարմօրէն շարունակել ձեր ծառայութիւնը անոնց բարեգարդման եւ զօրացման Համար՝ ի փառս Աստուծոյ եւ ի վայելումն Համայն մարդկութեան, գործակից ունենալով միւս եկեղեցիներու պետերը:*

*Պատմութեան վկայութեամբ անհաճոյ դէպքեր եւ անհամաձայնութիւններ շատ են եղած սրբատեղեաց եկեղեցիներու միջեւ, որոնց Հանդէպ Հայոց Պատրիարքութիւնը միշտ փորձած է քիստոնէական եղբայրական սիրով ի յայտ գալ խաղաղութեան եւ Համերաշխութեան ոգիով՝ յանուն միասնութեան եւ Համագոյակցութեան: Այդ ոգին ի յայտ*

եկած և միշտ մղիչ ոյժ եղած է ձեր սրտին ու մտքին մէջ, որուն մենք կը մօտենանք յարգանքով:

Հարցերու բարւոք լուծման համար անհրաժեշտ է տքնաջան աշխատանք և, առանց լետաձգման, կատարել քննութիւններ և պատրաստուիլ Status Quo-ի ժողովներուն: Ամէն բանէ առաջ, եկեղեցւոյ պետեր պէտք է ջանան ստեղծել այն համերաշխ միջնորդութիւնը, ուր կարելի ըլլայ վստահիլ իրարու, որ առաջին գրաւականն է խնդիրներու վերացման և կամ նուազեցման:

Ըմբռնենք, որ ժամանակը մեր բոլորին համար կը ներկայացնէ ղժուարին կացութիւն: Եթէ կ'ուզենք ունենալ նուազ փոթորկալից կեանք, պէտք է միացնենք մեր ոյժերը: Մեզմէ ոչ մէկը առանձինն զօրաւոր կամ անզօր է, միասնաբար մենք կարող ենք ըլլալ աւելի զօրաւոր և կայուն, որովհետեւ երբ եկեղեցի մը կը տկարանայ ժամանակի ընթացքին, անտարակոյս կը տկարանան նաև միւսները:

Քրիստոնէական ապրեցնող ոգին կը գործէ և կը զարգանայ միասնութեան մէջ միայն, թէկուզ ունենանք սկզբունքներու որոշ տարբերութիւններ: Մեր հովիւը՝ Քրիստոս, փոխանցեց մեզի իր սէրը, խաղաղութիւնը և ներշնչումը Սուրբ Հոգիին: Ըլլանք հաւատարիմ, պահենք զանոնք և աշխատինք այդ նոյն ուղղութեամբ:

Յանուն ներկաներուն, կրկին անգամ կը շնորհաւորեմ ձեր պատրիարքական նոր պաշտօնը, և ձեզի կը մաղթեմ առողջութիւն, քաջութիւն և աստուածահաճոյ գործերու յաջողութիւն:

Ընդունեցէք մեր բոլորին սէրը և աջակցութիւնը: Ծնորհակալութիւն:

Հայոց Տեսուչի խօսքէն ետք, Պատրիարք Սրբազան Հայրը խօսք առաւ և շեշտեց համագործակցութիւնը և համերաշխ ոգին սրբատեղեաց մէջ, նաև շնորհակալութիւն յայտնեց Յունաց և Ֆրանսիական միաբանութեանց տեսուչներուն:

Հիւրասիրութենէն ետք, Պատրիարք Սրբազան Հայրը միաբանութեամբ հանդերց վերադարձաւ Սրբոց Յակոբեանց Մայրավանք:

